



Aarrit nannullu takornariartitsinermi tammajuitsussarsiorluni piniartartunut pisassiissutigineqarsinnaanngorsinnaanerata siunertaralugu Naalakkersuisut, 2022 naatinnagu saqqummiunneqartussamik, nalunaarusioqqullugit peqquneqarnissaannik inatsisartut aalajangiiffigisassaattut siunnersuut. Nalunaarusiamittaaq aningaasarsiutaasinnaanerisa aammalu nunarsuarmioqatigiit aalajangersagaasa killilersugaat qulaajarneqassapput.

Inatsisartunut ilaasortaq Aslak W. Jensen, Siumut

Siullermeenera

Aarrit nannullu takornariartitsinermi tammajuitsussarsiorluni piniartartunut pisassiissutigineqarsinnaanngorsinnaanerata siunertaralugu Naalakkersuisut, 2022 naatinnagu saqqummiunneqartussamik, nalunaarusioqqullugit peqquneqarnissaannik inatsisartut aalajangiiffigisassaattut siunnersuut. Nalunaarusiamilu aningaasarsiutaasinnaanerisa aammalu nunarsuarmioqatigiit aalajangersagaasa killilersugaat ilanngullugit qulaajarneqassasut siunnersuummi saqqummiunneqarput.

Taamatut Naalakkersuisut 2022 naatinnagu saqqummiunneqartussamik nalunaarusioqqullugit peqquneqarnissaannik, tammajuitsussarsiniarnermut immikkut ittumik aavernik nannunillu pisassiinissamik Aslak W. Jensen Naleqqamiit qutsavigaarput.

Kalaallit nunatta kangiani taamatullu Avanersuarmi nannunniartitsisinnaaneranut aaffanniartitsisinnaanernullu tammajuitsussarsiorluni piniartartunut piniartitsisinnaanerup inunnut iluaqutaasinnaanerata nalunaarusiorneqarnissaa pisariaqartoq Naalakkersuisut siunnersuuteqartumut tapersiillutik oqaaseqarnerat Naleqqammit nuannaarutigaarput.

Aavernut nannunullu tunngatillugu tammaviutsussarsiorluni piniarsinnaanerup Tunumi Qaanaamilu innuttaasunut taamatullu piffinni allani iluaqutaasinnaanera qulaajarniarlugu iliuseqarniarlutik siunnersuut tapersorlugu oqaaseqarnerat nuannaarutigaarput siunnersuut pitsaasummat, nalunngilarpummi ukiorpassuit tamanna pillugu eqqartuisarnikuugatta, kisiannili assigiissorpasuartigut tunngavilersorlugu Namminersornerullutik Oqartussat tamatumalu kingorna Namminersorlutik Oqartussanngoraluarattaluunniit akiliisititsilluni nannunniarnissaq akuerinngisaannarsimasoq kiisami allanngorluni maannakkut Naalakkersuisuni nutaani



tapersorsorneqalerluni allannortoqarmat Naleqqamiit naammagisimaarluinnaripput oqaatigissavarput.

Tunumi Qaanaamilu piniartut aningaasarsiornikkut pisaqariaqartitsisut ukiorpassuannortuni killilersuinerujussuup kingunerisaani ilungersunartorujussuarmik inissittaartut oqariartortuartut tusaavagut atugaat pillugit anngussisaarpugut, taamaammatt uani Naalakkersuisuusarsimasut akuerinnngisaannarsimasaat maannakkut aavernut nannullu tammaviutsussarsiorluni piniarsinnaanerup Tunumi Avannersuarmilu innuttaasunut iluaqutaasinnaanera annertuujuusoq pillugu qulaajarniarmassuk nuannaajallaatigaarput Naleqqamiit.

Ilanngullugu Naalakkersuisut nannut amii neqaalu Kalaallit Nunaata Nammineerluni april-imi 2008-mi avammut inerteqqutigilersimasaa pillugu qanoq iliuuseqarnissaat sakkortuumik kaammattuutigerusupparput. Taamatut nunatta nammineq avammut annisseqqusiunnaarnermik nannut amii avammut tuniniarneqarsinnaaneratt nunatta nammineq mattussimasaa piniartukkormiut aningaasarsiorsinnaanerannut annertuumik innarliisimammatt Naleqqamiit neriutigaarput piaartumik aaqqiffigineqarnissaa angugasuarniarlugu qanoq iliuuseqarasuassasut. Tamatuma aqutissiorneranni aamma tammaviutsussarsiorluni pisassiisoqartalernerani anninniarnissaanut aporfiususaaq tamatuma Nunatta nammineq mattussisimanera qaangenera ilutigalugu pitsaanerusumik piniartut periarfissarsiorneqaannaratik tammaviutsussarsiorluni piniartoqartalernerat eqqunneqarpat aporfiunera atorunnaareersimanissaa Naleqqamiit pingaartikkatigu.

Piniartortatsinnut killilersuinerujussuup ingasattajaalersup saniatigut aporfilersuinerpassuit piiartariaqartut isumaqaratta neriuppugut Kalaallit Nunatta nammineq avammut nannup amiinik anisseqqussaajunnaarneq anigorniarlugu Naalakkersuisuni iliuuseqarasuassasut.

Taamatut oqaaseqarluta siunnersuut saqqummiunneqartoq pillugu Naleqqamiit siunnersuutip akuerineqarnissaa uaguttaaq akuersaarlutigu oqaaseqaateqarpugut.